

«Mussar il rumantsch en tut sias colurs»

210 000 francs per in'expoziun sur dal rumantsch



La visualisaziun da l'artista Anna Rita Stoffel en la Chasa dals chantuns a Berna pudess vesair or sumegliant a questa visualisaziun.

FOTO MAD



En la Chasa dals chantuns a Berna vegn lantschada quest atun in'expoziun cun il titel «Il Rumantsch è biodivers».

FOTO MAD, KDK/SIMON IANELLI

■ (fmr/sr) «Il Rumantsch è biodivers» è il titel da l'expoziun ambulanta che cumenza l'atun 2021 a Berna. Per quella ha la regenza approvà ina contribuziun maximala da 210 000 francs or da la finanziaziun speziala da la lottaria naziunala, sco ella ha cuminutgà quest'emna. I va per visualisar il rumantsch en la Chasa dals chantuns a Berna e pli tard en tants chantuns sco pussibel. Sin incumbensa dal chantun maina l'interpraisa «Projekt Box» a Malans quest project. Felicia Montalta e Patric Collet da la «Projekt Box» planiseschan, structureschan e mainan projects. Tenor Patric Collet è il project vegnì svilupà cun l'accompagnament professional da la Lia Rumantscha. Sco Johannes Flury, il president da la Lia Rumantscha, ha declarà sin dumonda

da la FMR, vai per mussar il rumantsch en tut sias colurs. Per la realisaziun dal project ha già lieu ina concurrenza e quella ha gudagnà l'artista e graficra Anna Rita Stoffel ch'è oriunda da Laax.

Biodiversità da la lingua

La biodiversità da la lingua interpretescha Anna Rita Stoffel cun ina visualisaziun a l'entrada da la Chasa dals chantuns a Berna. Là vegn projectà in maletg cun flurs e paradas – sumegliant ad in tarpun sin il palantschieu. Tgi che passa sin quel activescha flurs u utschels che sa muventan e rendan attent il visitader ch'i dat da vesair in'expoziun. Che quella è rumantscha vegn tradì dal sound (en ils tschintg idioms e rumantsch grischun) ch'enramescha la visualisaziun. L'expoziun en in dals pier-

tens mussa alura stailas cun in mix da texts, graficas e maletgs areguard cultura, istorgia, diaspora e lingua rumantscha. Sin las stailas s'entaupan las linguas naziunales per render chapibla l'expoziun a tut ils visitaders. En l'auter pieren vegnan «chaus rumantschs» cun lur statement davart lur lingua materna a pender giu dal palantschieu sura.

Iniziativa da Christian Rathgeb

Dapi il zercladur 2020 presidescha – cun il cusseglier guvernativ Christian Rathgeb – per l'emprima giada in represchentant dal chantun Grischun la Conferenza da las regenzas chantunales (CdC). Tenor Johannes Flury saja quai l'iniziativa da Christian Rathgeb da preschentar là il rumantsch. Ì duai vegnir profità da l'ocasiun per realisar in pro-

ject davart il rumantsch e per furnir uschia ina contribuziun a favur da la diversità linguistica sco er a favur da la promoziun linguistica.

Expoziun ambulanta

L'expoziun en la Chasa dals chantuns a Berna n'è betg publica. Suenten dus fin trais mais va l'expoziun – u tut tenor er be parts da quella – lura però sin viadi en ulteriurs chantuns. Ella po vegnir preschentada al public en chasas communalas, en scolas chantunales u en outras localitads adattadas.

Per che la tematisaziun dal rumantsch en la Chasa dals chantuns fetschia ina impressiun duravla èsi planisà – ultra da l'expoziun – da montar ina visualisaziun permanente en la Chasa dals chantuns.